

道光遵義府志

遵義府志卷二十五

典禮

我

國家

列聖

傳心萬年

垂則大經大法酌古今而執其中盡制盡倫咸三五而止至善

欽定會典通禮諸表悉萃周官儀禮之精所以表正八埏允哉登越千世恭檢官民通行錄爲一卷其在

壇廟祀典著之各篇庶邊陲遠徼亦能家有其書而葑屋茅檐罔不同遵

王道矣

頒詔禮

凡

頒詔之禮直省會城傳集耆老眾庶於公所候聽宣讀將軍督撫提鎮率所屬文武官具龍亭黃蓋龍旗御仗出郭恭俟

詔至跪迎齋

詔官奉設龍亭內旗狹導行各官興皆乘馬從至公廨陳

詔於堂上正中通贊贊排班禮生引各官就階下拜位文
東武西北面序立如朝賀儀贊跪眾咸跪宣

詔官恭奉西面宣讀訖贊跪叩興眾行三跪九叩禮畢廼
膳黃頒布府州縣衛營汛宣播

德音無有不徧贈凡

詔書經過地方官員軍民人等跪道旁候

詔過方起五里以內府州縣衛文武官俱出城迎送五里

外者不許檔冊

授時禮

凡頒朔之禮歲以孟冬一日頒來歲十有二月之朔

以前民用直省布政使司各給欽天監時憲書印貯於庫歲四月欽天監以奏準來歲時憲書式頒各布政使司刊刻成書鈐以所貯監印孟冬月彙送督撫署督撫設香案陳時憲書禮生引贊率所屬文武官朝服望闕行三跪九叩禮祇領訖布政使司廼分發專城之道府轉行所屬州縣分駐之提鎮轉行所屬標營到日行禮祇領均與會城同廼頒布民間山陬海澨無有不徧僞造者論如律典

慶賀禮

凡元旦冬至

萬壽節文武大小各官俱朝服望

闕行禮預設香案龍亭于公廳至日黎明各官朝服齊集
糾儀官一員先行禮立于簷下以糾儀贊禮生贊排
班大小各官以次就位文東武西立班齊贊跪叩興
各官行三跪九叩頭禮贊退各官退出凡慶賀前後
穿朝服七日前三日後四日

冊檔

迎春禮

每歲立春有司官遵照會典迎春于東郊出土牛先
期塑造春牛芒神前一日各官常服迎至府州縣門

外土牛南向芒神在東西向立春日早陳設香燭酒菓各官具朝服贊排班贊跪叩興各官行一跪三叩頭禮興贊跪奠酒領班官奠酒三爵贊叩興各官行一跪三叩頭禮興贊昇土牛芒神行香亭鼓樂前導各官朝服後隨至東郊各官執綵仗環立土牛兩旁贊擊鼓樂工搥鼓贊鞭春各官環擊土牛三禮畢各退按今有司迎春皆前期一日朝服于東郊迎昇土牛芒神安設長官公署之儀門外次日照依立春時刻祀芒神卽于安設土牛處鞭春○土牛式水土取歲德方位牛像頭至尾椿八尺按八卦尾一尺二寸按

十二時高四尺按四時胎骨用桑柘木顏色視立春
曰干爲頭角耳支爲身納音爲蹄尾肚各取所屬五
行分青赤白黑黃籠頭构索視立春曰支色四孟曰
麻仲曰苧季曰絲构子用桑柘芒神式身像高三尺
六寸按一年三百六十日寅申巳亥年像老子午卯
酉年少壯辰戌丑未年孩童正旦前後五日內立春
爲忙芒神與年竝立前五日外立春爲早忙立牛前
後五日立春爲閑立牛後六支陽年立右陰年立左
服色視立春曰支神受尅爲衣之腰頭
髻前後視立春曰納音位罨耳提戴視立春時氣鞋

袴行纏有無擊懸左右視立春日納音之氣與位鞭
結用柳枝長二尺四寸按二十四氣結子麻苧絲視
日孟仲季俱五采染色並檔

行香禮

每月朔望日有司官皆詣各廟行香跪叩九六三視
各廟祭祀之數雍正間覆准朔望行香須在黎明以
昭誠敬又每月行香後詣明倫堂講書亦與上任講

書儀同

檔

救護禮

凡遇日月食文武各官遵照會典依部頒欽天監推

算時刻於本衙門救護凡日食結綵于本衙門儀門
及正堂設香案于月臺上設金鼓于儀門內兩旁設
各官拜位于月臺上俱向日陰陽生報日初食贊禮
生贊排班各官俱朝服立贊跪叩各官行三跪九叩
頭禮班首官上香贊禮生贊跪各官俱跪班首官擊
鼓三聲眾鼓齊鳴再上香各官俱暫起立上香畢各
官仍跪以後上香行禮同陰陽生報復圓鼓聲止贊
禮生贊跪叩各官行三跪九叩頭禮禮畢各官散月
食儀同按明制外官救護日食朝服于布政司府
州縣月食于都使司衛所行禮

國朝順治初年仍沿明制十四年定例日月食俱于本衙門行禮月食救護與日食儀同又會典救護自初食以至復圓皆穿朝服今初穿補服次穿素服次穿朝服

上任禮

凡新官到任本衙門預備儀仗前期出城迎至日新官具公服首領官率各房吏典併合屬官人等導引新官先詣城隍廟陳牲醴致告行一跪三叩頭禮獻爵讀祝或有誓詞讀畢仍行一跪三叩頭禮如前儀畢導引至本衙門儀門前陳牲醴致祭行一跪三叩

頭禮如前儀畢導引至月臺上設香案朝服望

闕行三跪九叩頭禮易公服拜印行一跪三叩頭禮畢坐公座開印皂隸排衙吏房呈押公座畢叅見吏役屬官畢三日內行香講書

附行香儀前一日定期至日視各廟應穿禮服及跪叩儀節分別行禮如文廟三跪九叩頭闕帝廟同文廟城隍廟土地祠一跪三叩頭之類

講書儀先於明倫堂設公座及講案文武諸生拱候于儒學門新官至一揖導引詣明倫堂公座諸生行庭參禮新官拱答如儒學官同坐敘說畢講書直講

之生向上三揖端立抗声講說書義畢三揖而退又輪直講如前儀講畢新官申訓辭分給紙筆獎直講者新官起諸生仍趨儒學門拱候揖送

開封印信禮每正月開印十二月封印皆遵照部行欽天監擇定日時行禮儀注開印儀與上任拜印同封印跪叩同開印惟標記印封不呈押公座講約禮

每月朔望日于講約所宣講

聖諭十六條曉諭士民人等恭設

聖諭牌設約正直月以司講約設木鐸老人以宣警于道路

地方文武教職各官齊集贊禮生贊排班各官依次就拜位立贊跪叩興各官行三跪九叩頭禮畢分班坐地率領軍民人等聽講畢各官散○雍正七年奉部文覆准凡州縣城內及大鄉村擇一寬閒潔淨之處設爲講約所約正置二籍德業可勸者爲一籍過失可規者爲一籍直月掌之月終則以告于約正而授于其次每月朔日直月預約同鄉之人夙興會集于講約所俟約正及耆老里長皆至相對三揖眾以齒分左右立設几案于庭中直月向案北面立先讀

聖諭廣訓皆抗聲宣誦使人鵠立悚聽然後約正推說其義

剴切叮嚀使人警悟通曉未達者仍許其質問講畢
于此鄉內有善者眾推之有過者直月糾之約正詢
其實狀眾無異詞乃命直月分別書之直月遂讀記
善籍一遍其記過籍呈約正及耆老里長默視一遍
皆付直月收掌畢眾揖而退歲終則考校其善過彙
冊報于府州縣官府州縣官設爲勸懲之法有能改
過者一體獎勵使之鼓舞不倦並檔乾隆元年議准
直省各州縣于各鄉里民中擇其素行醇謹通曉文
義者舉爲約正不拘名數令各就所近村鎮恭將

聖諭廣訓勤爲宣講誠心開導竝摘所犯律條刊布曉諭仍

上諭

嚴飭地方官及教官不時巡行講約之所實力宣諭使人人共知倫常大義如有虛立約所視爲具文者該督撫卽以怠荒廢弛題叅照例議處乾隆五年奉

充故論治者往往先養後教朕御極以來日爲斯民籌衣食之源水旱之備所期薄海烝黎盡藏充裕俯仰有資以爲施教之地而解愠阜財之效尙未克副朕懷第思維皇降衷有物有則衣食以養其身教化以復其性二者相承而不相妨不容偏廢正如爲學之道知先行後然知行並進非劃然兩時判然兩事又安得謂養之道未裕遂可

置教化爲緩圖也今學校徧天下山陬海澨之人無不挾詩書而遊庠序顧學者徒以文藝弋科名官司以課試爲職業于學問根本切實用功所在概未暇及司牧者盡心於簿書筐篋或進諸生而譚舉藝則以爲作養人材振興文教其于閭閻小民則謂是蚩蚩者不足與興教化平時不加訓迪及陷于罪則執法以繩之無怪乎習俗之不淳而詬誶囂凌之不能禁止也朱子云聖人教人大概只是說孝弟忠信日用常行的話人能就上面做將去則心之放者自收性之昏者自明此深探立教本源至爲切實蓋心性雖民之秉彝而心爲物誘則放性爲欲累則昏存心

養性非知道者不足與幾若夫事親從兄則家庭日用人共由孩提知愛少長知敬又人人同具不待勉強要之堯舜之道不外乎是卽如得一食必先以食父母得一衣必先以衣父母此卽是孝能推是心而凡所以順其親者無不至則爲孝子父之齒隨行兄之齒雁行此卽是弟能推是心而凡所以敬其長者無不至則爲悌弟一人如此人人從而效焉一家如此一鄉從而效焉則爲善俗孟子曰人倫明於上小民親於下又曰人人親其親長其長而天下平由是道也惟在上者不爲提撕警覺則習而不察而一時之明不勝夫積習之漸染重昏錮蔽日入于禽獸

而不自知任君師之責者奚忍不爲之申重而切諭之也我

聖祖仁皇帝頒

聖諭以教士民首崇孝弟

皇考世宗憲皇帝衍爲廣訓往返周詳已無遺蘊但朔望宣講祇屬具文口耳傳述未能領會不知國家教人字字要人躬行實踐樸實做去人倫日用正是聖賢學問至切要處堯舜之世比戶可封只是能盡孝弟放僻邪侈觸陷法網只爲不知孝弟記曰將爲善思貽父母令名必果將爲不善思貽父母惡名必不果誠能如此存心豈復有縱欲

妄行之事苟不從此處切實做起雖誦讀詩書高談性命
直謂之不學可耳凡有牧民課士之責者隨時隨事切實
訓誨有一事之近於孝弟則從而獎勸之一事之近于不
孝不弟則從而懲戒之平時則爲之開導遇事則爲之剖
晰如此則親切而易入將見父詔兄勉日積月累天良勃
發率其良知良能以充孝弟之實藹然有恩秩然有義豫
順積于家庭太和翔于宇宙親遜成風必從此始凡吾赤
子其敬聽諸凡厥司牧其敬奉諸

學政
全書

風教

凡崇祀名宦鄉賢之禮直省司牧之官有功斯民遺

愛難泯者薦紳處士積學力行垂範鄉里者由學校
師生公舉以達州縣州縣以達督撫學政歲於八月
具疏部加覆覈歲終彙疏以

聞列祀名宦鄉賢二祠

凡旌表節孝之禮直省由州縣報督撫學政均詳具
實蹟造冊送部覈定歲終彙疏以

聞孝子崇祀忠義孝弟祠其節婦自年三十至五十或年
逾四十而歿守節已閱十五年以上者

賜清標彤管四字以表其閭仍於節孝祠內彙姓氏勒諸
貞珉其有奇節苦行者各

賜銀三十兩建坊重門春秋祭於祠內孝女與孝子同貞

女烈婦與節婦同

凡旌表義行之禮民有屢世同居和睦無間者建坊里門題名忠義孝弟祠若出粟以周族黨振貧乏捐財以治橋梁修道路均由有司旌其閭爲數多者奏請敘錄

凡優老之禮百歲老民

賜銀三十兩建坊里門題以昇平人瑞四字

老婦旌以逾貞壽之門

百歲者加

賞銀十兩內府幣一百有十歲者倍之百二十歲以上者

請

旨加賞不拘成例

凡慈幼之禮直省各設育嬰堂收養幼孤之無歸者又民有一產三男者給米五石布十疋

凡掩骼埋斃之禮八旗及內府佐領各給塋地直省州縣建義塚有貧不能葬及無主暴骨皆收埋之民有收瘞遺骸年久不怠者有司旌表其閭

並會典

吉禮

品官家祭之禮於居室之東立家廟一品至三品官廟五間中三間爲堂左右各一間隔以牆北爲夾室

南爲房堂南檐三門房南檐各一門階五級庭東西
廡各三間東藏遺衣物西藏祭器庭繚以垣南爲中
門又南爲外門左右各設側門四品至七品官廟三
間中爲堂左右爲夾室爲房階三級東西廡各一間
餘制與三品以上同

世爵公侯伯子

八品

廟三間中廣左右狹階一級堂及垣皆一門庭無廡

以篋分藏遺衣物祭器陳于東西房餘與七品以上

同

在籍進士舉人

七品堂後檐北設四室奉高曾

祖禰四世皆昭左穆右妣以適配南向高祖以上親

盡則祧由昭祧者藏主于東夾室由穆祧者藏主于

西夾室遷室祔廟均依昭穆之次東序西序爲祔位

伯叔祖之成人無後者伯叔父之成人無後及其長

殤至十六歲者兄弟成人無後及其長殤中殤至十二歲

者妻先歿者子姓成人無後及其長殤中殤下殤至九歲

至十者皆以版按行輩置書男統於東女統於西東

西向歲以春夏秋冬仲月擇吉致祭戒子弟讀祝一

人贊禮一人執爵每案二人分薦祔位東西各一人

凡在廟所出子孫年及冠以上者皆會行禮○右廟

制祭期

先祭三日主人及在事者咸致齋前一日主人率子

第盛服入廟祗潔除拂拭畢執事者於各室前設几
八前供案堂南總香案一鑪擎具附位東西各統設
一案設祝案於香案之西設尊爵案于東序設盥槃
於東階上祗割牲一品至三品官羊一豕一四品至
七品特豕八品以下豚肩不特殺祗條祭器三品以
上每案俎二鉶二敦二邊六豆六七品以上邊四豆
四八品以下邊二豆二皆俎一鉶敦數同代以時用
槃梔者聽
辨祭器之實俎實牲體鉶實羹敦實飯邊實時菓餅
餌魚腊獸腊之屬豆實炙𦍋時蔬之屬○右致齋具
牲饌

屆日五鼓主人朝服與祭執事者盛服入廟主人俟於東階下族姓俟庭東西以昭穆世次爲序執事者陳鑪鐙于供案南陳尊爵于東序案代以壺陳祭文於祝案實水于盥槃加巾主婦率諸婦盛服入詣爨所眡烹飪羹定入于東房治籩豆之實陳鉶敦匕箸醯醬以俟質明子弟之長者盥詣各室前跪一叩興啟室奉主以次設於几昭位考右妣左穆位考左妣右分薦者設東西耐位畢贊禮立堂東檐下西面諸執事分立東西序端相向贊就位主人升自東階盥詣中檐拜位立族姓行尊者立於東西階上卑者立

於階下皆重行北面贊叅神主人入堂左門詣香案

前跪執事二人

司爵

一奉香槃一挹尊酌酒詣主人

左右跪左進香主人三上香右進爵主人酌酒于地

以爵奠於案興退出右門復拜位及族姓行一跪三

叩禮贊初獻主婦率諸婦出于房薦七箸醯醬于几

前案北跪一叩興徧及耐位退入于房庖人解牲醴

實于俎執事者奉以升各薦於供案主人詣高祖案

前執爵者奉爵主人獻爵奠於正中跪叩興以次詣

曾祖祖禰案前獻爵如前儀分薦者徧獻耐位酒訖

退立於拜位贊讀祭文主人跪族姓皆跪祝詣祝案

之左跪讀祭文曰維某年月日孝孫某謹告于某考

某官府君某妣某氏之靈曰氣序流易時維仲

春秋

追感歲時不勝永慕謹以潔牲庶品粢盛醴齊敬薦

歲事以某親某氏等祔食尙饗讀訖興以祭文復於

案退主人以下一叩興贊亞獻庖人納羹飯于東房

主婦率諸婦和羹實於鉶實飯於敦出薦於案及腊

肉炙馐徧跪叩興退如初禮主人獻爵於各位之左

贊三獻主婦率諸婦出於房薦餅餌果蔬叩退主人

獻爵於各位之右分薦者徧獻祔位酒均如初獻儀

贊受嘏祝取高祖供案酒饌降至香案旁主人詣香

案前跪祝代祖考致嘏於主人主人啐酒嘗食反器
於祝接以興主人一叩興復位贊送神主人以下一
跪三叩贊望燎祝取祭文由中門出送燎主人退避
東階下行輩長者咸降階主人詣燎位眡燎畢與祭
者出主人率子弟納神主上香行禮徹祭器傳于燕
器潔滌謹藏之闔門各退○右祭儀

日中廼餽三品以上時祭徧舉四品至七品春秋二
舉八品九品春一舉庖人熟酒饌僕人布餽席于堂
東西北上陳醯醬於席四隅棧楪匙箸之屬皆辦與
祭者尊卑咸在從曾祖諸父居東第一席從祖諸父

居西第一席諸父次東一席諸昆弟次西一席諸子
諸孫在東西之末各一席序定主人肅尊者入席從
曾祖諸父卽席從祖諸父東向尊者肅揖就位諸父
東向揖西向揖就位諸昆弟揖如之復揖諸父就位
諸子揖如諸父復揖諸昆弟諸孫揖如諸子復揖諸
子皆就位主人離席僕執壺實酒從主人酌諸尊長
酒每酌一人肅揖尊長答揖徧就位子弟之長者離
席僕人執壺從敬酌主人諸子弟咸避席揖主人答
揖復位主人命諸子弟徧酌酒席中少者舉壺各酌
於其長者旣徧皆坐主人興舉酒請於尊長坐尊長

廼嘗酒卒爵衆嘗酒卒爵僕人進食主人興請于尊
長坐尊長舉箸嘗食廼皆食每進食子弟間行酒三
巡長幼獻酬交錯飲無算爵湯飯畢長者起主人請
畱長者告飽遂離席諸子弟咸隨以次出主人送長
者于門外入命徹席餽庖人僕人皆盡○右餞
凡恭遇

覃恩告廟行焚黃告祭之禮

制書至主人以黃紙恭摺一通奉于廳事正中諏吉日擇
同姓或戚屬已仕者一人宣

制戒子弟引贊二人通贊二人徧戒族姓屆期會行禮前

一日齋戒備告文祝文牲饌眠新贈之爵爲等至日

夙興灑掃堂宇供張設饌案

以追贈所及世數爲準

香案施架

如儀設改題神主案于堂東西向使人宿宣

制者主人朝服率子弟盛服入廟諸與祭者皆會主人詣

贈祖室前啟室焚香跪子弟一人奉告文跪于主人

之左讀告文辭曰維某年月日孝子某

或稱孝孫隨宜謹告

於某考某官府君某妣某封某氏之靈曰某幸得列

於位恭逢

恩命

贈及先人敬請神主祇受

制書改題奉祀謹告讀訖興主人叩興奉考主子弟奉妣主及族姓出廟門族于道左宣

制者奉

制書前引二人導行至廟眾跪接

制書入中門升中階南向立眾皆隨入至階下序立主人奉考主在東子弟奉妣主在西族姓重行立其後皆北面通贊分立東西柱前贊宣

制主人以下皆跪聽宣

制畢奉主行三跪九叩禮眾隨行禮宣

制官以

制書供香案架上主人奉主置改題案上揖勞宣

制者宣

制者答揖復揖辭降自西階主人從至廟大門外揖送入
改題神主爵位訖奉主復位序立叅神讀祝三獻酒
如時祭之儀祝辭曰維某年月日孝子某謹告于顯
考某府君顯妣某氏之靈曰某恭承庭訓列位于
朝仰荷

皇仁推恩所生贈考爲某銜妣爲某銜感念先澤祿弗逮
養茲以焚黃謹備牲醴用伸薦告尙饗祭畢焚黃竝
祝文奉主復于室闔室出主人以下皆退頒胙於宣

制者餽族姓如儀○右焚黃告祭

歲逢令節薦新物一二三品官每案時果四庶羞四
羹飯具四品至七品官每案時果二庶羞四八品九
品官每案時果庶羞各二餘同是日夙興主婦潔辦
果饌主人盛服率族姓子弟入廟然燈灑掃設案室
前訖盥洗啟室子弟分陳匙箸壺琖之屬于案北主
人序立於香案前族姓以次序列於主人之後主人
跪焚香訖叩興子弟奉果羞從主人詣高祖考妣位
前薦果薦羞畢子弟舉壺取琖酌酒進於主人主人
奠酒訖子弟復奉羹飯從主人薦羹飯訖以次詣各

案薦奠如前儀退至香案前率族姓子弟一跪三叩
興子弟徹饌主人闔室皆退○右時節薦新

月朔望日主人預備茶食之屬每案二器主人夙興
盥洗盛服率族姓子弟入廟灑掃潔神案啟室序位
於香案前主人跪焚香訖叩興子弟奉食及茶從主
人詣各神案前以次供食供茶畢退位率族姓子弟
行禮如時薦儀徹主人闔室皆退○右朔望獻茶

庶士

員監生員有頂戴者

家祭之禮於寢堂之北爲龕以版別

爲四室奉高曾祖禰皆以妣配位如前儀南向前設
香案總一服親男女成人無後者按輩行書紙位附

食男東女西相向事至則陳已事焚之不立版歲以
春夏秋冬節日出主而薦餅餌二槃肉食果蔬之屬
四器羹二飯二前期主人及與祭者咸致齋薦之前
夕主婦盛服治饌于房中厥明夙興主人吉服率子
弟設香案於南然燭置祭文堂北設供案二昭東穆
西均以妣配位均南向設祔案于兩序下各一男東
女西東西向主人以下盥奉木主設于案設祔位於
兩序案訖主人東階下立眾各依行輩東西序立主
人詣香案前上香畢率在位者一跪三叩興主婦率
諸婦出房中薦匕箸醯醬跪叩如儀退子弟奉壺主

人詣神案以次斟酒薦熟訖皆就案南跪叩興子弟
薦耐位畢主人跪在位者皆跪祝進至香案之右讀
祭文辭見品官祭禮減訖興退主人以下叩興再獻
主婦薦飯羹三獻主婦薦餅餌時蔬主人斟酒跪叩
均如初儀畢主人率族姓一跪三叩興祝取祭文及
耐食紙位焚于庭眾出主人納木主徹退日中而餽
春一舉布席于堂東西北上陳倚幾匙箸如其人數
傳祭食於燕器熱酒饌族姓至主人肅入序位以行
輩年齒爲等旅揖卽席進酒饌酬酢如禮湯飯畢長
者離席告退主人送於門外諸子弟皆隨以出徹僕

人餽餘食皆盡月朔望日主人及家眾夙興盥洗啟
寢室然燭詣香案前依行輩序立主人上香訖子弟
奉茶主人獻茶復位率眾一跪三叩興徹茶闔室眾
退若家有吉事主人盥洗啟室然燭焚香以其事告
行禮如朔望儀○右庶士寢薦

庶人家祭之禮於正寢之北爲龕奉高曾祖禰神位
歲逢節序薦果蔬新物每案不過四器羹飯具其日
夙興主婦治饌主人率子弟設案然燈啟室奉神主
于案上以昭穆序主人立於香案前家眾序立于主
人下以行輩爲先後主人上香一跪三叩興主婦陳

匕箸醯醬薦羹飯果羞跪叩如儀主人酌酒進于各位前凡三次皆跪一叩興畢主人率眾一跪三叩興納主于室徹退日中眾餽神食歲一舉論行輩先後同行序齒列坐酒行飯已肅揖以退月朔望日供茶然香燈行禮告事亦如之均與庶士儀同○右庶人寢薦

嘉禮

漢官此上自昏及爲子孫主昏豫訪門第清白女年齒相當者使媒氏往通言嫁許男年十六以上女年十四以上身及主昏者無期以上服皆可行下土庶人同

○右議昏

納采諏日主人具書

書辭隨宜
後仿此

請女爲誰氏出竝問

生年月日別具昏者生年月日附於書使媒氏豫告女家屆日夙興以子弟一人爲使公服侍於廳事主人公服奉書出西面授使者再拜使者避拜受書出如女家其日女氏主人設案于廟灑掃廳事待賓亦使子弟一人爲擯公服以俟賓至擯告主人如賓服出迎于門外揖入升堂賓左主人右入堂少深賓東面奉書致辭從者陳禮物于庭主人北面再拜受書賓避拜請退俟命擯揖賓款于別室主人以書入詣

廟陳于案上啟櫝告事如常告儀廼具復書具女所
出及生年月日附於書擯延賓升堂主人奉書出西
面授賓再拜賓受書避拜授從者請退主人請醴賓
賓禮辭許饌者布席中堂賓東主西揖讓就坐進饌
行酒三巡賓興離席告退揖主人答揖送賓于門外
如初使還復命主人納書如授書儀醴使者以家人
之禮○右納采

納幣諏日具書備禮物章服一稱章如其品一品至
四品幣表裏各八兩容飾合八事叙釧簪食品十器
五品至七品幣表裏各六兩容飾合六事食品八器

媒氏豫告女家屆日夙興主人遣使奉書及禮物如

女家女氏主人受書及禮物告廟具復書授賓醴賓

還復命主人禮使者竝同納采凡禮物豐儉各如其品不得踰越力不能

具者聽其量力○右納幣

昏期諏吉具書備禮物三品以上羊酒四品下鶩酒

豫日主人遣使如女家女氏主人迎賓入賓致辭請

期主人辭遜言期日宜賓廼奉書告期主人拜受具

復書授賓賓還復於主人皆如納幣儀○右請期

昏期前一日女家使人奉箕帚於婿室陳衾帷茵褥

器用具至日婿家筵于室中位東西向別設案于牖

下陳壺一琖四合盃

剖匏爲二合四琖以備三酌之用

設醺爵于堂

下之東壺琖具初昏壻公服俟于堂下有官者各以

其服若其子孫則攝盛三品以上攝五品服五品以

上攝七品服六品以下攝八品服儀從亦如之鐙鼓

樂人均不得過十二

凡品官並同

壻馬一乘二燭前馬婦

輿一乘

或車隨宜

檐蓋飾采絹垂流蘇五品以上前後左

右各二六品以下前二後二均竢於門外主人公服

出醺子

若自主昏則以有服尊長醺後仿此

位於堂東西面昏者升自

西階再拜執事者升授爵昏者跪受卒爵反于執事

者父命之迎昏者曰唯興降出乘馬執事者隨以雁

儀從在前婦輿在後如女家其日女父告於廟辭曰
某之第幾女某將以今日歸某氏敢告餘如常告儀
還醮女於內堂父東母西姆相女具服如飾服眡壻
之等出至父母前北面再拜侍者斟酒醴女如父醮
子儀父訓女以之家之道母施衿結帨申以父命女
識之不唯壻既至主人迎於門外揖讓入壻執雁從
入至廳事主人東階上西面壻西階上北面立奠雁
再拜主人不答拜姆爲女加景單穀爲之蓋首出壻揖降
女從主人不降送姆導女升輿二燭前輿壻乘馬先
俟於門婦至降輿壻導升西階入室踰闕媵婦家布送者

婿席于東御

婿家迎者

布婦席于西婿婦交拜訖姆脫婦

景媵御設匕箸醯醬婿揖婦卽對筵坐饌入卒食媵

取琖實酒醕婿御取琖實酒醕婦三酌用盃卒醕婿

出媵御施衾枕婿入燭出○右親迎

厥明婦夙興盥漱櫛總以棗栗服脩詣舅姑室姆入

設席於堂中爲位舅東姑西均南向舅姑卽席婦執

筴

竹器

實棗栗升自西階北面拜奠于席舅坐撫

之婦興降階執筴實服脩升拜奠席姑坐撫之舅姑

興入於室○右婦見舅姑

婦具酒饌設匕箸醯醬行盥饋禮舅姑就坐婦奉饌

人獻舅姑。既卒食，廼酌酒醕舅姑，皆再拜。舅姑卒飲，興廼共饗婦侍者布席於阼階上，西向。具酒饌，設匕箸醯醢。舅姑於堂中臨之。婦卒食，姑醕之。婦拜受，卒飲。舅姑先降自西階。婦降自阼階，退饗婦送者。男於外，女於內，酬以布帛。○右婦盥饋舅姑饗婦。

三日，婦見於廟。厥明，執事者設饌具。主人啟櫝陳主，如常祭禮。主人布席階下，之東。昏者在後。主婦布席階下，之西。婦在後，各就位，再拜。主人升，上香，獻酒，讀告辭曰：「某之第幾子某，今已昏畢，率新婦見餘辭。」如祭式，俯伏興，退立於東。婦進當中階下，北面再拜興。

復位主人復位及主婦以下行再拜禮畢納主徹退
若同居有尊者婦見如見舅姑禮見夫之伯叔母與
見姑同答以肅拜見娣姒小姑以夫之齒序拜皆答
拜夫兄弟之子若女受拜答以肅揖○右廟見

諏日昏者以贅

厭分所用

往見婦之父母主人迎於門

外揖讓入升堂奠贅壻北面再拜主人西面答拜請
見主婦主婦立於門內壻立於門外再拜主婦門內
答拜出主人醴以一獻之禮○右壻見婦父母

士昏禮

八品以下皆同

納采諏日具書媒氏告於女家主人

以子弟一人爲使者奉書如女氏女氏主人出迎賓

揖讓入門升堂賓東面致辭奉書主人西面受書再
拜賓避拜請退俟命主人使子弟待賓以書入告於
寢如儀具復書出授賓賓受書主人布席禮賓畢賓
揖辭主人送之如初使者還復命主人拜受書禮使
者行家人禮諏日納幣具書備禮物章服一稱八品以下
官如其品幣表裏各四兩容飾合四事食品六器媒
氏告于女家主人遣使奉書物行禮女家受禮告寢
復書禮賓賓復主人均如納采昏有日主人備醵酒
書昏期於束使媒氏奉如女家告女氏主人報束授
媒氏復昏前一日女家使人以匳具張陳壻室至日

壻家筵于室中位東西面別以案陳合卺器設醺爵
於堂東初昏壻攝公服俟於堂下壻馬一乘二燭前
馬婦輿一乘檐蓋前飾采絹二銓與鼓樂
人數見前俟於門外
主人盛服醺子于堂東命之迎壻出乘馬如女家雁
及婦輿從其日女氏主人告於寢如儀畢主人位內
堂東主婦位內堂西父醺女如壻儀壻至女家門外
主人出迎壻執雁從入主人東階上西面壻西階上
北面奠雁再拜主人不答拜姆加女景蓋首出壻揖
之降主人不降送姆導女升輿女家亦以二燭前輿
壻乘馬先俟於門婦至降輿導婦入室踰閤媵布

壻席於東御布婦席於西壻婦交拜訖姆脫婦景壻
揖婦卽席壻東婦西坐行合登禮厥明婦夙興俟見
舅位堂東姑位堂西皆南向婦以贄見於舅姑再拜
舅姑受贄婦具酒饌行盥饋禮舅姑就坐婦奉饌舅
姑卒食一醕婦再拜送酒舅姑卒飲其饗婦於阼階
及饗婦送者均與前同三日婦見祖禰於寢陳設如
薦儀主人在東昏者從主婦在西婦從再拜主人升
詣香案前上香奠酒告畢俯伏興退立於東婦進當
門中再拜興復位主人復位及主婦以下皆再拜興
禮畢退諏日壻以贄見婦之父母迎入奠贄再拜主

人答拜見主婦壻拜於寢門外主婦答拜於門內出
主人醴壻皆如儀○右士昏

庶人昏禮納采諏日書昏者生年月日以授媒氏奉
如女家女氏主人受書告於寢書女爲誰氏出及生
年月日授媒氏道遠具饌近則否媒氏復命主人禮
之納幣備禮物服一稱用帛無章綢絹四兩容飾四
事食品四器媒氏奉如女家女氏主人受之饗媒氏
復命如納采禮昏有期備鵷書昏期於束使媒氏奉
如女家告女氏主人許使媒氏復昏前一日女家使
人以匱具陳於壻室至日壻家筵於室中東西爲位

別以案陳合登器設醮爵於廳事東序初昏壻盛服
俟於階下壻馬一乘二燭前馬婦輿一乘檐蓋無飾
鐙鼓樂人均不得過八俟於門外主人盛服至廳事
東位西面壻升主人醮之命之迎壻再拜出乘馬如
女家雁及婦輿從其日女家告於寢醮女以俟壻既
至主人出迎於門外導入壻執雁從入升堂主人東
階上壻西階上北面奠雁再拜姆加女景蓋首出壻
揖之降婦從降姆以女登輿二燭前輿壻乘先俟於
門婦至降輿壻揖入室踰闕布席壻婦交拜訖姆脫
婦景壻揖婦就位坐壻東婦西行合登禮婦夙興盛

服以贄見舅姑于堂拜獻如禮饋酒食于舅姑舅姑
饗婦及婦送者三日婦見祖禰于寢如常薦儀諏日
壻往見婦之父母婦父設酒食禮壻如儀○右庶人
昏並通禮

凶禮

官員喪禮有疾居正寢女居疾革遺摺三品以上官

遺言皆書之既終子號哭擗踊去冠被髮徒跣諸婦

女子去笄期功以下丈夫素冠婦人去首飾皆易素

服男哭牀東女哭牀西異向作魂帛結白絹為位於

尸東前設案奠閣餘生前食所餘脯醢酒果用吉器立喪

主

以適長子無主則長孫承重

婦

以亡者之妻無妻及母之喪則以喪主之妻當之

護喪

司賓司書贊祝諸執事人治棺

民公采棺朱紫飾金花侯伯一品官以下

珠及凡喪具護喪者使人上遺摺訃於有司及親屬

僚友○右初終

越日小殮侍者於寢室施幃設浴牀於尸牀前牀東

置案陳沐浴巾櫛含具三品以上含用小珠玉五七

品以上用金玉屑五襲牀在浴牀西襲事陳其旁常

服一稱朝衣冠帶各以其等侍者遷尸浴牀南首諸

子哭踊婦人出

女喪則男出

廼去尸衣覆以殮衾侍者奉

湯入哭止沐髮櫛之晞以巾束之抗衾而浴拭以巾

訖結襲衣縱置於牀南。領尸易牀。徹浴。牀浴具。埋巾櫛及餘水於屏處。廼去衾襲。常服朝服。加面巾。喪主以下爲位而哭。喪主及諸子坐于牀東。奠北。同姓丈夫以服爲序坐。諸子後。西面。主婦及諸婦女子坐於牀西。同姓婦女以服爲序坐。諸婦後。婢妾又在其後。東面。均南上。尊行。丈夫坐東北。壁下。西上。尊行。婦女坐西北。壁下。東上。異姓丈夫坐於幃外之東西上。異姓婦女坐於幃外之西。東上。若內喪則同姓丈夫皆坐幃外之東。異姓丈夫皆坐幃外之西。執事者執含具前。喪主起。盟親含尸。訖哭復位。○右襲。

是曰執事者帷堂如寢陳殮牀於堂東加殮衣三品
以上五稱複三禪二五品以上三稱複二禪一七品
下二稱複一禪一皆以繒複衾一二品以上色絳四
品以上色緇五品色青六品色紺七品色灰紵絞皆
素帛既辦廼遷尸牀於堂中行殮事畢喪主暨諸子
括髮加首經腰經皆以麻婦麻髻餘同○右小殮
三日大殮執事者以棺入設於堂正中南首承以兩
甕棺內奠七星版藉茵褥施綿衾垂其裔於四外殯
藉三層侯伯一屆時奉尸入棺實生時所落齒髮卷
品以下一層衣以塞空處令充實平滿喪主以下憑棺哭踊盡哀

廼蓋棺加綻施麥三品以上比葬每月三麥五品以
上月再麥七品以上月一麥徹殯牀遷柩其處柩東
設靈牀施幃帳枕衾衣冠帶屨之屬設類盆帨巾於
靈牀側皆如至時柩前設靈座奉魂帛几筵供器具
建丹旣於門左內喪側門漢人以絳帛爲銘旌三品以
上長九尺五品以上八尺七品以上七尺題曰某官
某公內喪書某封某氏之柩縣以竹杠依靈石執事者陳饌
案食品用素器啟帷行殯奠禮內外就位如寢司祝
焚香奠酒喪主以下哭盡哀畢下帷每奠皆同及夜奉魂
帛復牀諸子次於中門之外寢苫枕塊不脫經帶諸

婦女子次于中門之內帷幔枕衾皆布素哀至則哭
晝夜無時○右大殮

是日成服五服各以親疎爲等斬衰三年子爲父母

爲繼母子之妻同庶子爲嫡母所生母慈母妾子無母父命

他妾養之者庶子之妻同爲人後者爲所後父母爲人後

者之妻同女在至及已嫁被出而反在室者爲父母

嫡孫承重爲祖父母祖在爲祖母服同若祖父俱亡

爲高曾祖後者同爲人後者承重爲所後祖父母承

重者之妻同妻爲夫妾爲家長服生麻布旁及下際

不緝麻冠經菅屨竹杖婦人麻屨不杖餘同齊衰杖

期嫡子眾子為庶母謂父妾嫡子眾子之妻同子為

嫁母親生母父卒而改嫁者出母親生母為父所出者夫為妻麻熟麻布

旁及下際緝之麻冠經草屨桐杖為父母在夫婦人麻

履餘同齊衰不杖期為改嫁繼母謂父卒繼母嫁而

則無為同居繼父謂父卒從母嫁兩無大功以上者為

伯叔父母及姑在室者為養母撫同宗及三歲下遺

棄子者若三歲下遺棄子不知本宗即赴所養家姓

氏應考出仕者為養父母之服同並令輕為兄弟及

姊妹在室者為兄弟之子及女在室者為子之為人

後者祖為嫡孫父母為嫡長子眾子及嫡長子之妻

爲女在室者繼母爲長子眾子孫爲祖父母孫女在

室出嫁同庶孫爲生祖母

若父先卒無與父同母之伯叔者爲生祖母持服同

並令輟考解任

女出嫁爲父母爲人後者爲本生父母庶子

之爲人後者爲本生生母

均令輟考解任

女在室及雖適人

而無夫與子者爲其兄弟姊妹及兄弟之子與兄弟

之女在室者女適人爲兄弟之爲父後者婦爲夫兄

弟之子及女在室者妾爲家長之父母家長之妻家

長之長子眾子與其所生子冠經履同上齊衰五月

孫及女孫

在室出嫁同

爲曾祖父母服熟桐麻布冠經如

其服草履婦人麻屨齊衰三月爲不同居繼父

謂先同居

後異居者若未嘗同居則無服爲同居繼父兩有大功以上親者孫

及女孫嫁在室出爲高祖父母冠經屨同上大功九月

爲從兄弟及姊妹在室者爲姑及姊妹適人者爲兄

弟之爲人後者爲兄弟之子爲人後者爲父之兄弟

爲人後者爲人後者爲本生祖父母若所後同祖者仍從本服餘仿

此爲本生伯叔父母爲本生兄弟及姑姊妹在室者

兄弟之子及女在室者祖爲眾孫及孫女在室者祖

母爲嫡孫眾孫及孫女在室者爲孫之爲人後者生

祖母爲庶孫同父母爲眾子婦及女之適人者伯叔

父母爲從子婦及兄弟之女適人者婦爲夫祖父母

伯叔父母爲人後者之妻爲夫之本生父母

其于夫之本生

除親則各從本服悉降一等報亦如之

女出嫁爲本宗伯叔父母本宗

兄弟及兄弟之子本宗姑姊妹及兄弟之女在室者

凡在室之女與男子同後仿此服麤白布冠經如其服繭布緣屨小

功五月爲伯叔祖父母爲從伯叔父母及從姊妹適

人者爲再從兄弟及姊妹在室者爲從兄弟之子及

女在室者爲祖之姊妹在室者爲父從姊妹在室者

爲兄弟之妻爲兄弟之孫及兄弟之孫女在室者爲

從兄弟之爲人後者爲外祖父母爲母之兄弟及母

之姊妹爲姊妹之子及女在室者嫡孫眾孫爲庶祖

母祖爲嫡孫之婦爲人後者爲本生曾祖父母

若所

會祖者仍從本服餘仿此

爲本生姑姊妹之適人者從兄弟及從

姊妹之在室者爲本生兄弟之姊妹及兄弟之女適人者婦爲夫兄弟之孫及孫女在室者爲夫之姑姊妹兄弟及兄弟之妻爲夫從兄弟之子及女在室者爲夫之伯叔爲人後者女出嫁爲本宗姊妹之適人者爲本宗從兄弟及從姊妹之在室者爲本宗伯叔兄弟及兄弟之子爲人後者曾祖父母爲曾孫之爲人後者妾子生有爲家長之祖父母服稍細白布冠經如其服屨同上總麻三月爲乳母爲曾祖兄弟及曾

祖兄弟之妻爲祖從兄弟及祖從兄弟之妻爲父再
從兄弟及父再從兄弟之妻爲三從兄弟及姊妹在
室者爲曾祖之姊妹在室者爲祖之從姊妹在室者
爲父之再從姊妹在室者爲兄弟之曾孫及曾孫女
之在室者爲兄弟之孫女適人者爲從兄弟之孫及
孫女在室者爲再從兄弟之子及女在室者爲祖之
姊妹父之從姊妹及已之再從姊妹適人者爲從兄
弟之女適人者爲從伯叔伯叔祖再從兄弟爲人後
者爲兄弟之孫從兄弟之子爲人後者爲母之兄弟
爲人後者爲姊妹之子爲人後者爲父姊妹之子爲

母兄弟姊妹之子爲妻之父母爲女之夫女之子若
女爲女之子爲人後者爲兄弟孫之妻爲從兄弟之
妻爲從兄弟子之妻爲人後者爲本生高祖父母若
後同高祖者仍從本服餘仿此爲本生伯叔祖父母祖姑之在室者
從伯叔父母從姑之在室者從姊妹之適人者再從
兄弟再從姊妹之在室者爲本生兄弟之妻從兄弟
之子及女在室者兄弟之孫及孫女在室者爲本生
母之父母及兄弟姊妹爲本生姊妹之子及女在室
者祖爲眾孫婦祖母爲嫡孫眾孫婦曾祖父母爲曾
孫曾孫女高祖祖父母爲元孫元孫女爲元孫之爲人

後者婦爲夫高曾祖父母爲夫之伯叔祖父母及夫
祖姑在室者爲夫之從伯叔父母及夫從姑在室者
爲夫之從兄弟姊妹在室出嫁同及從兄弟之妻爲夫再
從兄弟之子及女在室者爲夫從兄弟之女適人者
爲夫從兄弟子之妻從兄弟之孫及孫女在室者爲
夫兄弟孫之妻兄弟之孫女適人者爲夫兄弟之曾
孫及曾孫女之在室者爲夫之兄弟爲人後者女出
嫁爲本宗伯叔祖父母及祖姑之在室者爲本宗從
伯叔父母及從姑在室者爲本宗從兄弟之爲人後
者爲本宗從姊妹之適人者爲本宗從兄弟之子及

女在室者子爲父母改葬

既葬除之妻爲夫服細白孫爲祖後並同

布經帶如其服素履無飾凡喪三年者百日薙髮仕

者解任士子輟考在喪不飲酒不食肉不處內不入

公門不與吉事期之喪二月薙髮在喪不昏嫁九月

五月者踰月薙髮三月者踰旬薙髮在喪均不與燕

樂八旗官在京者三年喪持服百日後薙髮供職二

十七月內居家仍素服不與吉事爲祖父母兩月後

薙髮供職爲人後者爲本生父母爲曾祖父母爲撫

養庶母爲伯叔父母爲兄弟爲妻爲已授室之子一

月後薙髮供職

其在外內廷行走王公大臣官員給假十四日不兼職任之王以下入八

分公以上大臣京制服期內居家仍素服不與吉事

爲高祖父母爲庶母

子生有

爲伯叔祖爲從伯叔爲從

兄弟爲兄弟已授室之子爲兄之妻爲子婦爲已授

室之孫旣殯七日後薙髮供職爲伯叔祖母爲從伯

叔母爲再從兄弟爲弟之妻爲從兄弟之妻爲兄弟

子之妻爲孫婦殯後薙髮供職制服期內均不與燕

樂漢官在京者期功之喪給假持服眠八旗官之制

惟殯後供職者定給假三日

○右成服

大殮翼日喪主以下夙興侍者設頰水櫛具於靈牀

側五服之人各服其服就位侍者收頰櫛具奉魂帛

出就靈座朝奠眾哭執事者設果蔬酒饌如生時祝焚香斟酒點茶喪主以下詣案前再拜哭盡哀各以其服爲序皆男先女後宗親先外嫻後復位哭止日中設果筵奠酒及夕又奠均如朝奠儀侍者詣靈牀舒衾枕奉魂帛於牀上退諸子婦哭盡哀乃止每奠皆如之朔望則殷奠具盛饌於朝奠行之遇新物則薦如朝奠儀○右朝夕奠

越日行初祭禮侍者詣靈前設遺衣服於座執事者陳饌筵羊酒具楮幣民公筵十有五席羊七楮四萬侯筵十有三席楮三萬六千伯筵十有二席楮三萬

二千均羊六一品官筵十席羊五楮二萬八千二品
官筵八席羊四楮二萬四千三品官筵六席楮二萬
四品官筵五席楮萬有六千均羊三五品官筵四席
楮萬有二千六品七品官筵三席楮萬均羊二五服
之人咸集各以其服爲序司祝焚香斟酒喪主以下
詣案前再拜哭奠如儀卒奠侍者奉衣服及楮幣送
燎所焚燎大功者是日易素服行大祭禮儀與初祭
同期服者是日易素服○右初祭大祭

親賓聞訃告弔於喪主之家未殮至者入門易素服
司賓待於廳事以贈賻儀物授司書入臨尸哭盡哀

遂弔喪主持哭喪主以下哭稽顙無辭賓出司賓送成服以後至者各以其服弔具酒果香燭厚則加貨財皆書於狀先使從者持狀通名司書籍記之以禮物入陳靈前喪主以下就位哭司賓出迎賓入詣靈座前舉哀哀止跪焚香酌酒再拜興喪主出帷稽顙哭謝賓答拜慰唁出喪主入司賓延客待茶賓退司賓送於門外○右親賓弔奠賻如有

特恩

親臨賜奠者儀與親王喪禮同

親臨賜奠

右

如奉

特恩賜卹者戶部給祭銀公四十兩侯三十五兩伯三十兩子及一品二十五兩男及二品二十兩三品十六兩四品十二兩五品十兩六品八兩七品六兩工部給葬銀公六百五十兩侯六百兩伯五百五十兩子及一品五百兩男及二品四百兩三品三百兩四品二百兩五品以下一百兩一品以上奉

旨予諡者內閣擬諡以

聞翰林院撰擬碑文工部給碑價公侯伯四百兩子及一品三百兩二品以上遣官讀文致奠一次予諡者祭文由翰林院撰擬不予諡者由內閣撰擬屆日喪家設使者奠位於靈前設讀祝位於靈几之左設喪主及諸子跪位於靈右主婦跪位於帷內執事者豫陳祭物齋

諭祭文從使者素服至喪主率諸子免經去杖止哭出迎於門外道右先入就位跪俯伏贊者引使者升中堂就位立上香司祝就讀祝位立讀祭文訖復於案執事者實酒於爵授使者使者三奠爵畢少退喪主率

諸子降西階下行三跪叩禮向

闕謝

恩仍至大門外俟使者出跪送廼還苦次○右

賜卹致奠

品官卒於位與在任遭父母喪者初喪成服朝夕奠

皆如前儀擇日扶輓還家

卒於京者禮部給沿途照驗兵部給郵符夫馬在直

省者由任所督撫給咨牌均行本籍得入城治喪

備行舉儀從各抵其品告

啟期於親戚僚友啟行前一日行啟奠禮喪主以下

就位哭祝詣靈前跪告曰今擇某日奉靈柩還故鄉

敬告俯伏興喪主以下稽顙哭再拜興復位盡哀止

厥明遷奠告遷於柩前禮亦如之徹祝納魂帛於櫛
役人舉輦入遷柩就輦主人以下輟哭舐載出大門
加幃蓋發引儀從在前銘旌魂帛從喪主以下杖哭
隨柩及郊親戚僚友祖者向柩設祖奠役人停輦賓
向柩再拜主人稽顙哭謝賓退斂儀從遂行主人乘
素車途次止宿奉魂帛銘旌於靈柩前凡柩暫水行
停同則設奠陸行則上食次朝啟行亦如之至家前一日
遣僕戒家人豫於十里外布幕具奠以待至日五服
之人各服其服以迎柩至暫駐幕內設奠祝焚香斟
酒跪告曰靈輶遠歸將至家親屬來迎敢告俯伏興

眾序哭再拜興柩行咸徒步哭從至家安靈於所
所男女各就位哭設奠祝焚香斟酒跪告曰靈輿
歸至家敢告俯伏興眾哭拜如初受弔朝夕設奠
如前儀○右扶喪附

官員在外聞喪三年者訃至哭對使者問故又哭
哀易服如初喪儀訃於有司遂奔喪戴星而行見星
而止途中哀至則哭哭辟市邑將至家望其境其城
其鄉皆哭至家哭入門升自西階憑棺西面哭踊婦
人東面哭踊無算少頃尊卑相向哭細問病終之故
復哭廼被髮徒跣婦人不徒跣翼日成服括髮婦人

髮皆加麻經喪期以聞訃日始餘如在家之儀期以下聞訃者易服爲位而哭若奔喪則至家成服若官員在職非本生父母喪雖期猶從政不奔喪聞訃易素服爲位而哭各持其服於私家入公門治事仍常服期喪者一年不與朝祭之事服滿日於私家爲位哭除之○右聞喪奔喪

三月而葬營葬地及葬具凡塋地一品九十步

發步均自

塋心數至四旁

封丈有六尺二品八十步封丈有四尺三品

七十步封丈有二尺四品六十步封一丈五品五十步封八尺六品四十步七品二十步封皆六尺圍以

垣公侯伯周四十丈置守塋四戶二品以上周三十五丈守塋二戶五品以上周三十丈守塋一戶六品以下周十有二丈守塋二人設石像生公至二品用石人石馬石虎石羊石望柱各二三品減石人四品減石人石羊五品減石人石虎墓門勒碑書某官某公之墓

婦人則書某封某氏若合葬則並書之

公侯伯碑身皆九尺廣

三尺六寸螭首龜趺首高三尺二寸趺高三尺八寸

一品碑身高八尺五寸廣三尺四寸螭首龜趺首高

三尺趺高三尺六寸二品碑身高八尺廣三尺二寸

麒麟首龜趺首高二尺八寸趺高三尺四寸三品碑

身高七尺五寸廣三尺天祿辟邪首龜趺首高二尺
八寸趺高三尺二寸四品至七品碑身高三尺五寸
減五寸廣三尺五寸減二寸皆員首方趺其高均三尺
三品遞減二寸刻壙誌用石二一書如碑碣一詳記
姓諱諡字無諡則止書字州邑里居服官遷次及其生卒年
月日時葬處坐向所遺子女石字內向以鐵合而束
之作神主及主櫨製柩舉下爲方牀上編竹格爲蓋
四出檐垂流蘇繒繒均青藍色公侯伯繒五采
二品以上施散金五品以上畫雲氣六品七品素繒
無飾承以杠五品以上皆髹朱六品七品飾紅聖

柩畫嬰五品以上四六品七品二皆引布二功布一
靈車一儀從各從其品明器或塋土或以竹木及紙爲之各從其

俗○右治葬具

擇日開兆喪主率諸子適兆所以宗親或如賓一人
告于土神執事者設案兆左陳酒饌置祝文告者吉
服至盥詣案前立執事者二人奉香執壺琖隨立左
右告者跪上香再拜酌酒如儀祝奉祝文跪于告者
之左讀曰維某年月日其官某敢告于司土之神今
爲某官某塋建宅兆神其保佑俾無後艱謹以清酌
素羞祇薦於神尚饗讀畢興退告者俯伏興復再拜

退遂開壙隨地所宜使子弟幹事者一人畱胝之喪
主以下還○右開兆祀土神

葬有日豫以啟期告於親戚僚友發引前一日厥明
五服之人各服其服入就位哭朝奠訖祝跪告于殯
前曰今以吉辰遷柩敢告俯伏興喪主以下哭盡哀
再拜役人徹帟遷柩障以翼侍者移靈牀于堂正中
靈座几筵仍設祝奉魂帛前柩喪主以下哭從及外
堂布席置柩祝奉魂帛跪告曰請朝祖俯伏興執事
者布席於廟兩楹間祝奉魂帛詣廟喪主以下哭從
及門止哭入序立階下祝奉魂帛置席北正中再拜

興奉魂帛還靈座喪主以下從出廟門哭從如初○

右遷柩朝祖

日夕祖奠設饌如朝奠儀喪主以下舉哀祝盥詣靈座前喪主以下止哀祝焚香奠酒畢告曰永遷之禮靈辰不啻今奉靈車式遵祖道俯伏興喪主以下再拜哭盡哀親賓致奠行禮如成服致奠儀賓出喪主以下代哭如在殯時○右祖奠

厥明五服之人會葬若畢會執事者陳明器吉凶儀從於大門外公鞍馬八侯伯七一品六二品五三品四四品三五品以下二納靈車於門內之右役人舉

舉人

二品以上六十四人五品以上三十二人

設於堂上喪主

以下哭踊乃載喪主報哭眠載周維以絙令平正牢

實執事者設遺奠於庭如祖奠儀祝跪告曰靈輶既

駕往卽幽宅載陳遣禮永訣終天俯伏興徹役人以

杠輦舁柩祝奉魂帛就靈車奉主櫨設魂帛後柩出

大門施幃蓋屬引遂發丹旌銘旌前導

旗人以丹旌漢人以銘旌

次儀從次明器次靈車次功布次輦外親分挽引布

在前喪主以下經杖衰服男在柩旁步從女在柩後

輿從哭不絕聲尊行者皆乘車馬出城門若里門親

賓不至墓者於前途立向柩再拜役人權停輦乘者

皆下喪主哭謝賓退柩行如初若墓遠主人以下皆乘素車從望塋而下道中哀至則哭每宿設靈座置奠如在殯儀次日啟柩亦如之○右遣奠發引

葬之日執事者豫張靈幄於墓道右中置几一設藉柩席薦於壙外鋪陳壙中之事設婦人行幃於墓道之右靈車至幄外止祝奉魂帛置几上奉主櫬置魂帛側設奠如儀柩車至壙前役人脫載去幃蓋方牀下於藉席祝取銘旌去杠縱加柩上喪主以下憑棺哭踊盡哀親賓送者再拜辭歸喪主及諸子稽顙謝賓退屆時將窆內外五服之親以次再拜辭訣丈夫

哭羨道東婦人哭羨道西擗踊無算遂窆喪主輟哭
臨眡執事者整銘旌藏誌石設明器掩壙復土喪主
以下哭盡哀退就靈幄序立○右窆

是日祀土神於墓左如開兆祭儀惟祝辭營建宅兆改為窆兆擇

宗親善書者一人題主執事者設題主案於靈座東

南西向筆墨具對案設盥二一祝盥一喪主以下序

哭於靈座側祝盥啟櫝出木版卧置案上題主者盥

就位書某封諡某官顯考某公母則稱顯妣某氏神位訖祝

奉木主置靈案上焚香奠酒喪主以下再拜祝跪讀

告辭於靈座之右曰哀子某謹告於先考某官封諡

府君

母則稱先妣某封氏

形歸窀穸神返堂室神主既成伏惟

精靈舍舊從新是憑是依讀畢興復於案喪主以下

再拜哭盡哀祝焚告辭奉魂帛埋墓側奉主納櫨置

靈車而還在途不驅喪主以下哭從如來儀○右祀

土神題主

靈車至家喪主以下哭從入大門及庭止祝奉木主

出車竝櫨奉之設几上南向喪主及諸子在寢東西

向親屬以服輕重爲序在諸子後婦人哭於房中有

弔者如在殯儀廼修虞事執事者具牲饌品數各眡

其等陳設如祭禮

見吉禮官員家

祭祝啟櫨陳主於靈座主

人以下就位哭哭止贊叅神主人盥洗詣香案前跪
執事者二人一舉香盤一挹尊酌酒詣主人左右跪
左進香主人三上香右進爵主人酌酒於地以爵奠
于案退復拜位及諸子親屬行一跪三叩禮贊初獻
主婦率諸婦出於房薦匕箸醯醬於几前案北跪一
叩興退入於房庖人解牲體實於俎執事者奉以升
薦於供案執爵者奉爵主人獻爵于正中跪叩興復
拜位立贊讀祝主人以下跪祝詣祝案之左跪讀文
曰維某年月日朔孤子某敢告于先考某官母則稱
先妣某氏封某日月不居奄及初虞夙興夜處哀慕無時謹以

潔牲庶羞粢盛醴齊哀薦虞事尙饗讀畢興復於案
退主人以下哭一叩興贊亞獻主婦率諸婦和羹實
於鉶實飯於敦出薦於案及腊肉炙胾叩興退如初
主人獻爵於左贊終獻主婦率諸婦出於房薦餅餌
果蔬叩退主人獻爵於右如初獻儀贊送神主人以
下一跪三叩興哭祝焚祝文主人奉神主納櫝徹哭
止至夕奉神主於靈牀朝奉諸靈座朝夕朔望奠如
初遇柔日再虞遇剛日三虞如初虞祝祝文易初虞
爲再虞三虞

餘○右反哭虞

百日卒哭儀同虞祭祝文改虞
事爲成事卒哭之明日夙興執

事者詣廟具饌陳設如常祭禮設亡者案於祖考神
案東南南向祝啟室奉四世神主以次設於几如時
薦之位主人率眾先哭於几筵前奉亡者之主詣廟
諸子以下哭從及廟門止哭主人陳主於東南案上
序立階下焚香進饌祝讀告辭曰維某年月日孝曾
孫某謹以潔牲庶羞粢盛醴齊適於顯曾祖考某官
府君躋祔孫某官府君某尙饗次讀祝於亡者位前
曰孝子某謹以潔牲庶羞粢盛醴齊哀薦祔事於顯
考某官府君母則稱妣某封某氏適於顯曾祖考某官府君尙
饗餘行禮儀節與常祭同畢祝焚告文奉神主復於

室徹主人奉亡者之主復寢諸子以下從出廟門哭
隨至几筵前納於櫝訖哭止眾退護喪者代喪主爲
書使人徧謝親賓弔賻者○右卒哭祔

期而小祥於忌日行事質明祝啟櫝出主諸子及期
親就內外位哭盡哀焚香進饌酒讀祝辭同卒哭惟
改卒哭曰小

祥成事行禮與卒哭同○右小祥

再期大祥忌日行事先一日告遷於廟執事者具果
酒如常儀設案於東序西序前各一主人盥詣廟啟
櫝陳諸神主焚香進果酒如常告儀祝讀告辭曰維
某年月日孝孫某謹告於某官府君某封某氏四代
備書

茲以先考某官府君大祥已屆禮當遷主入廟某官
某府君某封某氏神主親盡當祧某官某府君某封
某氏以下神主宜改題世次遞遷不勝感愴謹以果
酒用申虔告尚饗讀畢焚祝主人以下俯伏興再拜
奉各神主卧置東案上子弟善書者一人改題高曾
祖神主訖以紙裹應祧神主陳于西序案奉改題主
遞遷于室虛左一位以俟闔室眾退厥明諸子諸婦
女子致祭于几筵前陳設行禮如初期儀惟祝辭改小祥曰大
日祥常事諸子從喪主奉亡者之主詣廟設於東室再
拜奉祧主藏于夾室闔門出廼徹寢室靈牀靈座罷

朝夕奠徹几筵斷杖棄之屏處○右大祥

中月而禫二十七月既周之日行事屆日夙興執事者設几案于寢堂之中主人率諸子入廟詣考位薦啟室焚香再拜跪告曰孝子某將祇薦禫事敢請神主出就正寢俯伏興奉主至寢堂陳于案執事者陳饌案於前喪主及諸子于東壁下就位舉哀婦人哭於房中焚香進果饌酒醴如常儀祝讀告辭曰維某年月日孝子某謹告于顯考某官府君神主禫制有期追遠無及謹以清酌庶羞祇薦禫事尙饗主人以下俯伏興再拜祝焚告文訖奉主復于廟闔室皆退

諸子素服終月始服常服○右禫

歲逢忌日前期齋厥明主人及子弟素服詣廟設案

於所薦神主室前主人盥啟室奉主就案焚香薦蔬

果酒饌告曰茲以某官某府君遠諱之神妣稱某氏謹

備庶羞清酌恭伸追慕俯伏興及子弟皆再拜如時

節薦新之儀禮畢徹納主闔室退○右忌日奠

歲寒食或霜降節拜掃墳塋其日主人夙興率子弟

素服詣墳塋執事者具饌酒僕人備芟剪草木之器

從既至主人周眡封樹僕人剪除荆草訖以次序立

墓前焚香供酒饌再拜在列者皆再拜興遂祭土神

陳饌墓左上香酌酒主人以下序立再拜退○右拜掃

士喪禮疾革書遺言既終子號哭擗踊去冠被髮徒跣諸婦女子去笄期功以下丈夫素冠婦人去首飾皆素服立喪主主婦護喪贊祝諸執事人治棺及凡喪具護喪者使人訃于有司及戚友執事者帷寢設浴牀于尸牀前襲牀在浴牀西東陳沐浴巾櫛含具含用金銀屑三襲事陳其旁常服一稱冠及禮服各以其等帶鞵皆備侍者遷尸浴牀南首諸子哭踊婦人出男女喪則廼去尸衣覆以殮衾侍者奉湯及巾櫛

入沐浴喪主及諸子止哭眠執事者結襲衣縱置於牀南領舉尸易牀徹浴牀浴具埋巾櫛及餘水於屏處乃去衾襲常服禮服加面巾卽牀前爲位立魂帛設奠陳生前所食脯醢酒果用吉器喪主以下爲位序哭如禮位詳見官員喪儀後同執事者奉含具前喪主起盥含尸訖哭復位越日小殮執事者帷堂陳殮牀於堂東加殮衣複一禪一複衾一紵絞皆備殮畢遷尸於堂喪主暨諸子麻括髮加首經腰經皆以麻婦麻髮餘同三日大殮執事者以棺入承以兩甕棺內奠七星版藉茵褥施綿衾垂其裔於四外屆時奉尸入棺

實生時所落齒髮卷衣以塞空處喪主以下憑棺哭踊盡哀廼蓋棺加綻施柩比葬月一黍徹殯牀遷柩其處柩東設靈牀施幃帳枕衾衣冠帶屨之屬設類盆帨巾皆如生時柩前設靈座奉魂帛几筵供器具門內立引旛漢人以絳帛爲銘旌八品七品九品及有頂戴者五尺題曰某官封未仕則否顯考某府君之柩婦則稱顯妣某氏依靈座之右設殯奠內外序哭如儀及夜奉魂帛復牀諸子次於中門之外寢苫枕塊不脫經帶諸婦女子次中門之內幃幔枕衾皆布素哀至哭晝夜無時○右

初終襲殯

是日成服輕重以親疎爲等

詳見官
員喪禮

厥明喪主以下

夙興侍者陳頽水櫛具於靈牀側五服之人各服其服就位侍者收頽櫛具奉魂帛出就靈座設奠焚香斟酒點茶喪主以下哭叩盡哀及夕如朝奠禮侍者詣靈牀舒枕衾奉魂帛於牀上眾哭盡哀乃止夕奠皆同朔望則具殷饌於朝奠行之初祭日陳饌筵三羊二楮一萬大祭儀同親賓弔奠如禮

見官員
喪禮

○右

成服朝夕奠及祭弔

士卒於其職

八品九品
以下同

或在職遭喪者扶襯還家聞

喪奔喪皆如品官之禮○右扶襯奔喪

三月而葬營葬地及葬具墳塋周二十步封高六尺

圍以垣周十二丈置守塋二人墓門石碣員首方趺

勒曰某官某之墓無官則書庶士某之墓婦則稱某封氏無封

則稱某氏刻墳誌式見官喪禮作神主及櫛置柩輦下爲方牀

上編竹格爲蓋四出檐垂流蘇絹荒絹幃杠輦飾紅

氈無娶引布二功布一靈車一明器仍各從其俗擇

日開兆喪主率諸子適兆所以親賓一人告土神執

事者陳酒饌于兆左告者吉服盥就位上香酌酒讀

祝祝辭均見官祝員喪儀下同行禮如儀遂開墳使子弟一人畱眠

之喪主以下還葬有期豫以啟期告于戚友發引前

一日厥明五服之人各服其服入就位朝奠訖告遷
柩於殯前喪主以下再拜哭盡哀役人入遷柩祝奉
魂帛前喪主以下哭從及外堂仍設座于柩前奉魂
帛辭於祖禰復于靈座從哭如初及夕祖奠如朝奠
儀喪主以下再拜哭盡哀親賓致奠行禮如成服致
奠儀賓出喪主以下代哭如初質明五服之人會葬
者畢會執事者陳明器於大門外設鞍馬二納靈車
於門內之右役人舉輦入八品三十二人九品及有頂戴者二十四人設
於廳事正中喪主以下哭踊廼載喪主輟哭眊載牢
實載訖設遣奠如祖奠儀役人舁輿祝奉魂帛就靈

車奉木版櫬設魂帛後柩出大門施幃蓋屬引遂發

引旛銘旌前導

旗人以引旛漢人以銘旌

次明器次靈車輦從外

親分執引布在前喪主以下經杖衰服男在柩旁步

從女在柩後輿從哭不絕聲出城門若里門親賓不

至墓者於前途立向柩再拜役人暫停輦喪主哭謝

賓退柩行如初及墓執事者豫張靈幃于墓右置靈

座几筵設題主案于右設藉柩席薦于壙前鋪陳壙

中之事設婦女行幃於羨道之右靈車至幃外止祝

奉魂帛於几上奉主櫬置魂帛側柩車至脫載去幃

蓋方牀下於藉席祝取銘旌縱加柩上喪主及諸子

憑棺哭婦人哭羨道西屆時男女以次哭叩辭訣親賓送者再拜辭歸喪主及諸子哭謝遂窆喪主輟哭眠執事者整銘旌藏誌石明器復土喪主以下哭盡哀執事者陳饌於墓左致祭土神如開兆祭儀喪主以下退就靈幃之左序立祝盥復魂帛於廂啟櫬出木版卧置案上宗親善書者一人盥就位題主訖祝奉木主於几上設奠焚香奠酒讀告辭喪主以下哭叩盡哀祝焚告辭奉魂帛埋於墓側奉主納櫬置靈車而返在途不驅喪主以下哭從如來儀○右啟殯至葬

靈車至家喪主以下哭從入門祝奉木主設几上諸子在寢東服親序在諸子後婦女哭於房中有弔者如在殯儀乃修虞事執事者具饌品數各以其等主人以下就位哭主婦薦羹飯主人獻爵讀祝行禮如時薦儀畢主人奉主納櫛徹哭止眾退百日卒哭儀同虞祭厥明執事者具饌於寢室如常薦禮設亡者案於祖考神案東南啟室陳神主主人率眾先哭於几筵前奉亡者之主如寢諸子以下哭從及寢門止哭陳主于東南案上眾序立焚香進饌讀告辭行禮如常薦儀祝焚告文奉神主復室徹主人奉亡者之

主復寢哭隨至几筵前納櫝訖哭止眾退○右反哭至祔

期而小祥於忌日行事厥明喪主以下及期親就內外位哭盡哀焚香進酒饌讀祝行禮儀與卒哭同再期而大祥先忌一日設案于寢堂東西各一主人率諸子詣寢堂啟室以遞遷改題之事告于祖陳設讀祝行禮如時薦儀廼以紙裏應祧神主陳於西案奉曾祖以下神主卧置東案使子弟善書者一人改題訖復於室遞遷其位虛室中下級以俟闔門出質明主人以下就几筵前序哭陳設行禮如初期儀主人

奉亡者之主躋於寢室再拜闔門徹靈牀靈座罷朝夕奠徹几筵斷杖棄之屏處奉祧主於墓祭而埋於側如儀二十七月既周設几筵於廳事正中主人以下如寢堂啟室奉新祔神主陳于廳事几上祇薦禪事主人及諸子位東壁下舉哀婦女哭於房中焚香薦果饌酒醴如儀畢奉主復於寢室闔門退諸子素服終月始復常服○右祥禫

歲逢忌日前期齋厥明主人及子弟素服如寢堂啟室出專薦之主于案焚香薦酒饌讀祝行禮如時節薦新之儀禮畢徹納主闔室退○右忌日奠

歲寒食節或霜降節日主人夙興率子弟素服具酒饌詣墓拜掃既至芟除荆草設饌於墓前主人以下序立焚香再拜興別陳饌於墓左祀土神行禮如儀
○右拜掃

庶人喪禮疾革書遺言既終子號哭擗踊去冠被髮徒跣諸婦女子去笄素服期功以下丈夫素冠婦人去飾男東女西異向環牀哭立喪主主婦使子弟護喪事治襲殮之具訃於親友踰時子弟奉湯及巾櫛入婦女出婦喪則男出沐浴喪主及諸子止哭周胝徹巾櫛及餘水埋之設襲牀于尸牀前陳衣冠帶舄遷尸

於牀襲喪主以下哭踊卽牀前爲位立魂帛設奠陳
生前所食酒饌內外序哭如禮喪主起盥含尸以銀
屑三旣襲幃堂設殮牀于堂東加殮衣複衾一皆以
絹紵絞皆備殮畢遷尸于堂執事者以棺入棺內奠
七星版藉褥施綿衾垂其裔於四外屆時奉尸入棺
實生時所落齒髮以衣實其空處喪主以下憑棺哭
踊盡哀乃益棺加綻施泰比葬一泰徹殮牀遷柩其
處柩東設靈牀施枕席衣被之屬設頽盆帨巾如生
時柩前設靈座奉魂帛几筵供器具設奠內外序哭
如儀及夜奉魂帛於牀諸子居柩側寢苦枕塊不脫

經帶諸婦女子易常次帷幔枕席用布素哀至則哭
晝夜無時○右初終襲殮

是日成服

見服制上

厥明五服之人各服其服就位子弟

設頽水帨巾於靈牀側斂枕衾奉魂帛出就靈座設
奠焚香酌酒點茶喪主以下哭叩盡哀及夕設奠亦
如之舒枕衾復魂帛于牀徹頽具眾哭盡哀乃止以
至於虞朝夕同初祭大祭具饌筵二羊一楮六千親
賓弔奠如禮若在外聞訃者奔喪成服均如士喪之
禮○右成服朝夕奠及祭弔

踰月而葬營葬地及葬具墳塋九步封四尺牆四圍

周八尺守墳二人有誌無碣擇吉開墳祀土神作神
主備靈車一柩輦一別製布衾衣柩不施幃蓋杠輦
兩端飾黑中飾紅塋發引前一日喪主以下就位哭
朝奠訖奉魂帛辭於祖禰還靈座晡時設祖奠以永
遷告喪主以下再拜哭盡哀厥明五服之人畢會納
靈車於大門內之右納柩輦於廳事內外各就位哭
徹幃遷靈座役人六十有八舉柩就載衣以大衾喪主以
下哭眡載訖設奠柩前如祖奠禮奉魂帛就靈車置
主櫬于後乃發引前列明器及鞍馬一男女以次哭
從及墓執事者豫設藉席於壙前設靈座于墓道之

右設奠案於座前設題主案於奠案右靈車至奉魂帛于座柩至脫載下於藉席喪主以下憑棺哭婦女哭墓右屆時男女以次哭叩辭訣諸親會葬者均以次哭叩辭歸喪主及諸子哭謝廼窆納柩于壙下誌石復土祀土神如儀喪主以下退就靈座之側序立子弟啟櫬奉木版卧置案上宗親善書者一人題主訖子弟奉置靈座納魂帛於廂設奠讀告辭畢喪主以下哭叩盡哀祝焚告辭奉魂帛埋於墓側奉主納櫬遂行喪主以下哭從如來儀○右啟殯至葬靈車至家子弟豫設几筵於殯寢故處奉木主陳之

喪主以下序哭如士喪反哭之位廼虞饌品器數牀
薦禮主人以下就位哭主婦薦羹飯主人薦酒饌讀
祝行禮如時薦儀畢主人奉神主納櫝徹哀止眾退
百日卒哭設奠行禮儀同虞祭厥明喪主以下夙興
哭於几筵前奉主詣寢陳于祖考神室東南以祔告
啟室陳設行禮如時薦儀畢仍奉主復於几筵納櫝
退○右反哭虞祔

期而小祥忌日行事厥明喪主以下及期親就內外
位設奠哭叩如卒哭儀再期大祥先一日詣寢以改
題告遷於祖考如士喪告遷之儀屆日夙興喪主以

下就几筵前序哭設奠行禮儀同初期主人奉亡者之主躋祔於祖再拜闔門出徹靈牀靈座几筵罷朝夕奠斷杖棄之屏處奉祧主埋於墓側如庶士儀二十七月既周設几案於廳事奉新祔神主陳之喪主以下就內外位哭奠行禮如常薦儀禮畢復主於寢闔門退諸子素服終月始常服○右禫祥

忌日主人具饌羞羹飯夙興及子弟素服啟寢室出專薦之主於案焚香薦酒饌行禮如常薦儀畢納主闔室退○右忌日奠

歲寒食或霜降節具饌主人率子弟素服拜掃墳墓

既至芟除荆草訖設饌於墓前主人以下焚香再拜
興別陳饌於墓左祀土神行禮如儀○右拜掃

相見禮

直省官啟體相見之禮賓至署從者通名門吏啟門
儀衛止儀門外賓由中門入至外堂檐下下輿馬主
人迎於檐前揖賓入每門讓於賓及廳事各再拜興
主人爲賓正坐西面賓禮辭主人固請卒正坐賓爲
主人正坐東面亦如之主人揖賓就位坐執事者進
茶主賓各揖飲茶敘語畢賓避席揖辭退主人答揖
賓出主人送至外堂檐下眡乘輿馬乃退總督河道

總督漕運總督與巡撫相見總督巡撫與學政鹽政
織造

欽差官相見織造與督撫司道運司相見關監督與司道

府廳相見若係三品以上京堂職銜者與督撫提鎮

相見竝同

兼銜或武職三品以上者不在此例

直隸州知州與知府直

隸州州同州判與府同知通判知縣與府首領州同

州判相見均同兩司首領官與府廳州縣相見用名

柬由中門入惟照磨知事見府廳名柬用晚生由左

門入皆行賓主禮同知通判見知府名柬用晚生由

中門入行賓主禮州縣佐貳見州縣如之教職見州

縣名柬用晚生由中門入行賓主禮提督與總兵官相見總兵官與非所屬之副將相見叅將與副將游擊與非本轄之副將游擊與叅將都司與非本轄之叅將游擊都司與守備千總與把總相見均與文職敵體相見儀同○右直省官敵體相見

直省文屬見長官之禮初見具銜名履歷公服詣署司道見督撫至大門外降輿入及儀門由左門入督撫迎於外堂後屏內督撫先行司道隨入及廳事司道當楣北面稟叅督撫辭乃三揖督撫西面答揖督撫正坐司道東傍侍坐

旅見則以次東西面

命坐揖茶至揖凡

司道揖督撫均答揖辭出三揖如初督撫送至屏門外司道三揖俟督撫入門復三揖趨出至大門外乘輿督撫次日用名柬答拜若公事謁見常服通銜名三揖就坐餘如前儀知府見督撫督撫不迎送不答拜餘如司道見儀同知通判見督撫轅門外下輿馬餘與知府見同州縣見督撫轅門外下輿馬升堂北面再拜興三揖辭退三揖督撫皆立受餘如府倅見儀知府同知通判見司道司迎送於屏門外道迎送於堂檐下坐次知府等東位西面司道位於西南東北面餘如見督撫儀司道用名柬答拜州縣見司道

行庭叅禮司道不迎送餘如知府見儀州縣見知府
迎送於屏門外餘如見司道儀見同知通判迎送於
堂檐下餘儀同直隸州知州見長官及接屬官儀與
知府同直隸州州同州判見長官及接屬官儀與州
縣同敎職見督撫司道知府等官均如知縣見儀首
領佐雜官見督撫司道知府行一跪三叩禮不揖不
坐府首領縣佐貳等官見同知通判如州縣見司道
儀雜職官見同知通判如見知府儀見知縣如州縣
見知府儀運使鹽道見鹽政與司道見督撫儀同運
同運副提舉運判見鹽政與府廳見督撫儀同運同

運判見運使與府廳見司道儀同鹽運使司經歷知
事大使等官見本轄長官與首領雜職官見長官同
如鹽大使由科甲出身者見本轄長官與州縣同運
司見督撫如司道儀運同如知府儀運副提舉運判
如同知通判儀關監督所屬稽察稅務之府佐貳見
監督如府廳見道儀河道總督漕運總督所屬官見
長官均如文武屬官見長官儀督撫新蒞任司道遣
役迎於境內府州縣官於所治十里內躬迎十里以
外不出迎司道以下官蒞任屬官準此○右直省文
職見長官

直省武屬見長官之禮初見具銜名履歷披執副將見提督轅門外下馬門吏稟白傳命免披執易公服佩刀由左門入升堂北面稟叅辭三揖提督西面答揖坐次提督正坐副將侍坐茶畢辭退三揖如初提督送至階下常見不披執仍佩刀餘儀同見本鎮總兵官迎於堂後屏內送至屏外坐次副將東位西面總兵官位西南東北面餘如見提督儀凡副將揖總兵官皆平立答揖叅將游擊見提督行一跪三叩禮畢三揖提督起立答揖坐待茶畢辭退揖如初提督起立不送餘如副將見儀見總兵官如副將見提督

儀見本鎮總兵官如見提督儀游擊見本轄副將副將出位送餘如見總兵儀都司守備見提督披執北面跪自宣銜名三叩提督坐受命坐西面席地坐不設茶辭出三叩趨退提督不起立公事謁見常服佩刀不宣銜名餘儀同見總兵官傍坐待茶餘如見提督儀見本轄副將不宣銜名凡揖皆起立答揖餘如見總兵儀若非本轄則如游擊儀見本轄叅將游擊初見行庭叅禮常見三揖叅將游擊僉坐都司守備傍坐茶畢三揖辭出叅將游擊出位送凡揖皆答餘如見副將儀若非本轄守備稟叅辭乃三揖叅將游

擊答揖趨出送至屏內千總把總見提督總兵副將
叅將游擊皆不坐餘如守備見提督儀千總見本轄
都司守備初見行庭叅禮都司守備答揖常見一揖
就坐都司守備正坐千總傍坐茶畢趨出餘如守備
見游擊儀若非本轄稟叅辭乃三揖皆答揖茶畢趨
出送至屏外把總見都司守備初見三叩答揖常見
一揖傍坐茶畢趨出都司守備起立不送餘如見游
擊儀○右直省武職見長官

直省儒學弟子員見學師之禮與國子生見國學師

儀同

按國學生見國子師之禮初見具名束公服詣
學首領官引自東階升堂北面三揖師立受侍

立于左西面受教畢三揖退若燕見通名俟召乃入
師迎于階上弟子升階揖師入門從入北面再拜師
西面答揖趨正師坐師命坐東北面揖師位于西南東
北面弟子西面旅見則以次東西北面揖師出送前
請問揖辭退北面三揖師皆答揖俟師入乃退學政按
行弟子從及二門外弟子三揖俟師入乃退學政按
臨次日釋奠學宮講學於明倫堂提調等官謁見如
儀教職引學弟子員進見各三揖退立學弟子員出
班講書俟行賞罰畢各退○右直省學校師弟子相
見

受業弟子見師長之禮初見師未出先入設席正位
俟於堂下師出召見乃奉贊入奠贊於席北面再拜
師起答揖興謹問起居命之坐乃侍坐有問則起而

對辭出三揖師不送常見侍坐請業則起請誼則起
師有教立聽命坐乃坐師問更端仍起而對朝入一
揖暮出一揖與同學弟子均以齒序○右受業弟子
見師長

士人敵體相見之禮賓及門從者通名主人出迎於
大門外揖入及門及階揖如初登堂主賓均北面再
拜興主人趨正賓坐賓禮辭主人卒正坐左還賓正
主人坐亦如之卽席賓東位西面主人西位東面飲
茶敘語畢賓退揖及階及門揖辭主人均答揖乃送
賓於大門外揖如初若見父之執友與見尊長儀同

○右賓友相見

卑幼見有服尊親之禮及門從者通名族外次尊長
召入見升階北面再拜尊長西面答揖命坐胝尊長
坐次侍坐於側茶至揖敘語畢稟辭三揖凡揖尊長
皆答出尊長不送若尊長來見卑幼迎送於大門外
行禮坐次如前儀○右卑幼見尊長

冠服通制

文一品朝冠頂鑲花金座中飾東珠一上銜紅寶石
補服前後繡鶴朝帶鑲金銜玉方版四每具飾紅寶
石一坐褥冬用狼皮夏用紅褐餘皆如公武一品補

服前後繡麒麟餘皆如文一品雨衣雨冠均用大紅色文二品冬朝冠薰貂爲之十一月朔至上元用貂尾頂鏤花金座中飾小紅寶石一上銜珊瑚補服前後繡錦雞朝帶鏤金圓版四每具飾紅寶石一吉服冠頂鏤花珊瑚雨冠紅色雨衣雨裳青色惟各省督撫均得用色紅坐褥冬用獾皮夏用紅褐緣皁褐餘俱如文一品武二品補服前後繡獅餘俱如文二品文三品朝冠頂鏤花金座中飾小紅寶石一上銜藍寶石補服前後繡孔雀朝帶鏤花金圓版四吉服冠頂用藍寶石坐褥冬用貉皮夏用皁褐緣紅褐餘皆如文二品武

三品冬朝冠薰貂爲之補服前後繡豹餘皆如文三品惟無緣貂朝服及端罩一等侍衛戴孔雀翎端罩狔狔獬爲之間以貂皮月白緞裏餘皆如武三品雨冠用大紅色雨衣青色文四品冬朝冠薰貂爲之頂鏤花金座中飾小藍寶石一上銜青金石補服前後繡雁朝帶銀銜鏤花金圓版四吉服朝頂用青金石蟒袍通繡八蟒皆四爪雨冠紅色前加緣二寸五分後五寸青色

四品以下在官及講官雨冠

內廷行走

坐褥冬用山

羊皮夏用阜布餘皆如文三品武四品補服前後繡虎餘皆如文四品二等侍衛戴孔雀翎端罩赤豹皮

爲之素紅緞裏朝服翦絨綠色用石青通身雲緞前後方襴行蟒各一腰帷行蟒四中有襃積領袖俱石青粧緞冬夏皆用之餘皆如武四品雨冠

御前侍衛

乾清門侍衛皆用紅色雨衣雨裳

御前侍衛用紅色其餘侍衛各從其品

四品官以上及御前侍從官衣

服織文均得用蟒

○右一品至四品冠服

文五品朝冠頂鏤花金座中飾小藍寶石一上銜水晶補服前後繡白鵬朝服片金綠色用石青通身雲緞前後方襴行蟒各一中有襃積領袖俱石青粧緞

冬夏皆用之朝帶銀銜素金圓版四吉服冠頂用水
晶坐褥冬用青羊皮夏用藍布襯白氈餘皆如文四
品武五品補服前後繡熊餘皆如文五品惟無朝珠
三等侍衛戴孔雀翎端罩黃狐皮爲之月白緞裏朝
服翦絨緣如文五品朝服之制餘皆如武五品文六
品朝冠頂鏤花金座中飾小藍寶石一上銜碑礪補
服前後繡鸞鷟朝帶銀銜玳瑁圓版四吉服冠頂用
碑礪坐褥冬用黑羊皮夏用黑櫻色布餘皆如文五
品惟無朝珠五品官以下惟京堂翰林科道得用貂
裘朝珠六品官以下惟禮部主事司務
光祿寺署正署丞典簿太常寺博士典簿國子監
丞博士助教學正學錄太常寺讀祝官贊禮郎鴻臚

寺鳴贊

壇

廟

武六品補服前後繡

執事

殿廷侍儀得用朝珠

餘皆如文六品藍翎侍衛戴藍翎端罩朝服朝珠均

如三等侍衛餘皆如武六品雨冠紅色青緣雨衣素

色文七品朝冠頂鏤花金座巾飾小水晶一上銜素

金補服前後繡鸕鶿朝帶素銀圓版四吉服冠頂用

素金蟒袍通繡五蟒皆四爪雨冠青色前加緣二寸

五分後五寸紅色坐褥冬用鹿皮夏用灰色布餘皆

如文六品武七品補服制如武六品餘皆如文七品

文八品朝冠鏤花陰文金頂無飾補服前後繡鸕鶿

朝服色用石青雲緞無蟒領袖皆青倭緞中有襞積

朝服色用石青雲緞無蟒領袖皆青倭緞中有襞積

冬夏皆用之朝帶銀銜明羊角圓版四吉服冠鏤花
陰文金頂坐褥冬用麕皮夏用土布餘皆如文七品
武八品補服前後繡犀牛餘皆如文八品文九品朝
冠鏤花陽文金頂補服前後繡練雀朝帶銀銜烏角
圓版四吉服冠鏤花陽文金頂坐褥冬用獺皮夏用
土布餘皆如文八品武九品補服前後繡海馬餘皆
如文九品未入流冠服制如文九品雨冠青色紅綠
雨衣青色凡文武侯補候選官頂帶均與現任同
以上官得用諸花繒八九品官用雜花
及素繒舉人祇七品貢監生員祇八品○右五品至

九品冠服

左都御史左副都御史監察御史直省按察使及道補服均前後繡獬豸其都察院都事經歷筆帖及按察使經歷照磨等官俱照本身品級不得用豸補服○右都御史御史直省按察使各道冠服會試中式貢士朝冠鑲花金頂上銜金三枝九葉狀元金頂上銜水晶授職後各貳其品舉人公服冠頂鑲花銀座上銜金雀公服袍青紬爲之藍緣披領如袍飾公服帶制如文八品朝帶吉服冠頂銀座上銜素金貢生吉服冠鑲花金頂餘皆如舉人監生吉服冠素銀頂餘皆如貢生生員公服冠頂鑲花銀座上

銜銀雀公服袍藍紬爲之青緣披領如袍飾公服帶制如文九品朝帶吉服冠制如監生外郎耆老冠頂以錫民人冬夏帽上不得用絨纓大結○右士民冠服

一品命婦朝冠頂鑲花金座中飾東珠一上銜紅寶石餘皆如民公夫人二品命婦朝冠頂鑲花金座中飾紅寶石一上銜珊瑚吉服冠頂鑲花珊瑚餘皆如一品命婦三品命婦朝冠頂鑲花金座中飾紅寶石一上銜藍寶石吉服冠頂用藍寶石餘皆如二品命婦四品命婦朝冠頂鑲花金座中飾小藍寶石一上

銜青金石朝袍片金緣繡文前後行蟒各二中無蟒
積後垂石青條雜飾惟宜朝裙片金緣上用綠緞下
石青行蟒雜緞皆正幅有襕積吉服冠頂用青金石
蟒袍通八蟒皆四爪餘皆如三品命婦五品命婦朝
冠頂鑲花金座中飾小藍寶石一上銜水晶吉服冠
頂用水晶餘皆如四品命婦六品命婦朝冠頂鑲花
金座中飾小藍寶石一上銜碑礫吉服冠頂用碑礫
餘皆如五品命婦七品命婦朝冠頂鑲花金座中飾
小水晶一上銜素金吉服冠頂用素金蟒袍通五蟒
皆四爪餘皆如六品命婦○右命婦冠服

品官曾祖父母祖父母父母妻受封者冠服得如所封之品本身加級受封冠服均從本任惟致仕後得照所封之品服用其京外革職畱任之員得照原品頂帶服用其有因公革職未追

封誥者祇許服用原官頂帶○右品官父母及原任官冠服

儀衛通制

直省文職總督杏黃繖青扇飛虎旗兵拳雁翎刀獸劔金黃棍桐棍皮槊迴避牌肅靜牌各二旗槍四青旗八巡撫杏黃繖青扇獸劔金黃棍桐棍皮槊迴避

牌肅靜牌旗槍各二青旗八

二品以上大臣
見到京人

景運門內

許帶從官一人布政司按察司杏黃繖青扇金黃棍迴避牌

肅靜牌各二青旗六各道杏黃繖青扇各一桐棍皮

槩迴避牌肅靜牌各二青旗四知府同府倅藍繖青

扇各一桐棍皮槩各二肅靜牌二青旗四知州知縣

竝同縣佐藍繖一桐棍二教職藍繖一雜職竹版二

河道漕運總督眡總督學政鹽政織造暨各

差官三品以上眡巡撫四品以下眡兩司

督撫與夫八
司道以下教

職以上與夫四雜職乘馬餘同京官三品以上得用
引馬欽差官三品以上與夫八武職三品仍不

用得○右直省文職儀衛

直省武職提督杏黃繖青扇飛虎旗兵拳雁翎刀獸
劒刑杖迴避牌肅靜牌各二旗槍四青旗八總兵官
杏黃繖青扇飛虎旗大刀獸劒迴避牌肅靜牌旗槍
各二青旗八副將杏黃繖一青扇二金黃棍迴避牌
肅靜牌各二青旗六叅將游擊都司杏黃繖青扇各
一桐棍迴避牌肅靜牌各二青旗四守備減牌餘
都司各省駐防將軍都統副都統以下官均與京
職同

武職均乘馬將軍提督總兵官年逾七十不能
常乘馬者聽其奏聞請旨二品以上得用

引○右直省武職儀衛

一品命婦車輿阜蓋四角綠緣綠幃阜帷輿用銀頂

二品命婦皐蓋不緣飾綠幘皐帷三品命婦皐幘
眠二品四品命婦青幘餘眠三品輿用錫頂五品以
下命婦均青蓋餘眠四品自二品以上命婦用繒餘均用布凡儀衛皆從其夫
○右命婦儀衛並同上

第宅制

凡第宅公侯以下至三品官基高二尺四品以下高
一尺門柱飾黝堊中梁飾金旁繪五采雜花三品以
上房脊得立望獸公門釘縱橫皆七侯以下至男遞
減至五五均以鐵土庶人惟油漆與職官同餘各有
禁逾制者罪之會典

方伎

凡陰陽家由直省有司官擇明習術數者申督撫咨

部給劄爲陰陽學府州縣各一人府曰正術從九品州

曰典術縣曰訓術均流以轄日者形家之屬禁其幻

妄惑民郡邑有大典禮大興作卜日候時用之

凡醫師由直省有司官選諳於醫理者咨部給劄爲

醫學府州縣各一人府曰正科從九品州曰典科縣曰

訓科均流凡疾醫瘍醫咸屬之民有疾病者疖瘍者

使醫分治獄囚病視療亦如之官給其藥餌故者結

報有詐病而扶同欺隱者罪之

出家爲僧道者置首領以約束之在直省

府府道紀州曰僧正道正縣曰僧會道會均

府二人州縣各一人由直省咨部給劄均擇其樸

者爲之仍服方外衣冠不得與職官竝列○僧道不

守規列者聽所司究治若所犯事涉軍民聽有司記

鞫有作姦犯科者論如編管爲民○僧尼受戒老

給度牒道士女冠給執照年逾四十許授徒一人以

牒照相傳若僧未受戒尸道有室者不得授徒牒照

止其身送部策銷○寺觀以僧道爲廟祝有遠方僧

道投止驗無牒照卽報所司訊究私畱者論婦女入

通志卷二十五
廟遊觀廟祝不禁拒者罪與本人同○僧道不得於
市肆誦經托鉢陳說因果斂聚金錢違者懲責游手
頑民托名方外或指稱仙佛謬許前知以惑民聽者
從重治之若創立無爲白蓮焚香聞香混元龍元洪
陽圓通大乘等教誘致愚民男女擾雜擊鼓鳴金迎
神賽會者論如律直省守土官嚴行禁止上同